

# Savaateqarneq, hiistiuteqarneq kiisalu nersussuaateqarneq pillugit Namminersorlutik Oqartussat nalunaarutaat

Nunalerineq pillugu Inatsisartut inatsisaanni nr. 5, 2. maj 1996-imeersumi § 5, § 12, § 13, imm. 2, § 14, imm. 6 kiisalu § 15, imm. 2 malillugit aalajangersarneqarpoq:

*Atuuffi*

**§ 1.** Nalunaarut manna savanut, hiistinut kiisalu nersussuarnut nerukkaatissat nerukkaasarnerillu annertussusissaasa aalajangersarneqartarnerannut kiisalu savat, hiistit aamma nersussuit inaasa aaqqissuunneqartarnerannut atuuppoq.

*Nassuaanerit*

**§ 2.** Nalunaarummi paasinninnissamik nassuaatit uku atorneqarput:

- 1) "FE" "Nunani Avannarlerni nerukkaatissanik ataatsimoortunik ataatsinik atuinerattut paasineqassaaq, nerukkaatissat 1 kg-t suaasiassat kimiannut nassuaatitut.
- 2) "Ivikkanit nerukkaatissat" paasineqassapput nerukkaatissat ipaasaqarluartut FE-mut ataat-simut minutsit qulit sinnerlugit atorlugit tamuasassat aamma nerukkaatissat panertortai kii-luugaangata 1 FE-mik annikinnerusut.
- 3) "Nerukkaatissat kimittuut" paasineqassapput nerukkaatissat ipaasaqarpiangngitsut FE-mut ataatsimut annerpaamik minutsit qulit atorlugit tamuasassat aamma nerukkaatissat panertortai kiiluugaangata minnerpaamik 1 FE-mik nalillit.
- 4) "Agguaqatigiissillugu ulloq piaqqiviusussaq" paasineqassaaq ulloq angutikuluut savanut akulerutsinneqarnerat nuliartussanngorlugit ullanik 144-nik kingoqqullugu.
- 5) "Naasut naalerlaat" paasineqassaaq qaqqami sivinganerni kujammut-kujammut kimmun sammisuni naasut naalersut.
- 6) "Nunaatilik" paasineqassaaq inuk imaluunniit ingerlatseqatigiiffik Nunalerineq pillugu Inatsisartut inatsisaanni nr. 5, 2. maj 1996-imeersumi § 3-mi piumasaqaataasunik naammassinnissimasoq.
- 7) "Nersussuit minnerit" paasineqassaaq nersussuit Dexter-inik naggiillit.
- 8) "Nersussuit annerit" paasineqassaaq nersussuit allanik tamanik naggiillit.

*Nerukkaatissanik pigineqartussanik kiisalu savanik, hiistinik aamma nersussuarnik nerukkaasarnermut  
piumasagaatit*

### **§ 3. Nunalerinermik ingerlatalik kinaluunniit savaateqartoq**

- 1) ukiut tamaasa kingusinnerpaamik 1. november minnerpaamik 125 FE-nik savanut ataasiakkaanut tamanut nerukkaatissaateqassaaq, taakkunannga minnerpaamik 35 FE-t savanut ataasiakkaanut tamanut ivikkanit nerukkaatissaassapput,
- 2) Savat piaqqiortussat puallarserlugit nuliartitsinissarlu qaammat ataaseq sioqquillugu nerukkaatissanik kimittuunik nerukkarneqarsimappata, kingusinnerpaamik 1. november ukiut tamaasa imm. 1, nr. 1-impi neqartunit 50 %-inik annertunerusunik nerukkaatissaqartitsiso-qassaaq, savanut ataasiakkaanut tamanut minnerpaamik 187,5 FE-nik, taakkunannga minner-paamik 54 FE-t ivikkanit nerukkaatissaassapput.
- 3) ukiumi tulliuttumi 1. aprilip nallernerani savanut ataasiakkaanut tamanut minnerpaamik 36 FE-nik nerukkaatissaateqassaaq, taakkunannga minnerpaamik 12 FE-t savanut ataasiakkaanut tamanut ivikkanit nerukkaatissaassapput,
- 4) piffissami 1. novemberimiit agguaqatigiissillugu ulloq piaqqiviusussaq sapaatit akunnerinik arfinilinnik sioqquillugu savanut ataasiakkaanut tamanut ullormut minnerpaamik 0,5 FE-nik nerukkaasoqartassaaq,
- 5) piffissami agguaqatigiissillugu ulloq piaqqiviusussaq sapaatit akunnerinik arfinilinnik sioqquillugumiit piffissap piaqqivissap tungaanut savanut ataasiakkaanut tamanut ullormut minnerpaamik 0,8 FE-nik nerukkaasassaaq. Piffissami tassani ivikkanik nerukkaatissat savamut ataatsimut ullormut minnerpaamik 0,27 FE-usassapput, aamma
- 6) piffissamit piaqqiviusumiit naasunik naalerlaaqalernissaata tungaanut savanut ataasiakkaanut tamanut ullormut minnerpaamik 1,35 FE-nik nerukkaasassaaq, taamaattoq sivikinnerpaa-mik ulloq 1. maj tikillugu. Piffissami tassani ivikkanit nerukkaatissat savanut ataatsimut ullormut minnerpaamik 0,27 FE-usaassapput.

*Imm. 2. Nunalerinermik ingerlatalik nunanik neriniartitsivinnik nersutaatinillu malittarisassaqartitsinkut aqtsineq pillugu Namminersornerullutik Oqartussat nalunaarutaat naapertorlugu ukiuunerani neriniartitsisarnissamut akuersissuteqarfingineqarsimappat imm. 1, nr. 3-mi minnerpaamik nerukkaasarnissamik piumasaqaat savamut ataatsimut ullormut 0,4 FE-nut appartinneqassaaq, ulluni ukiuunerani neriniartitsisarnissamut akuersissutip atorneqarfii.*

### **§ 4. Nunalerinermik ingerlatalik kinaluunniit hiistiuteqartoq**

- 1) ukiut tamaasa kingusinnerpaamik 1. november minnerpaamik 500 FE-nik hiistinut ataa-siakkaanut tamanut nerukkaatissaateqassaaq, taakkunannga annerpaamik 300 FE-t hiistinut ataasiakkaanut tamanut ivikkanit nerukkaatissaassallutik, aamma
- 2) hiistinut ataasiakkaanut tamanut ullormut minnerpaamik 3,0 FE-nik nerukkaasoqartassaaq.

### **§ 5. Nunalerinermik ingerlatalik kinaluunniit nersussuaateqartoq**

- 1) ukiut tamaasa kingusinnerpaamik ulloq 1. november minnerpaamik 525 FE-nik nersussuarnut minnernut ataasiakkaanut tamanut nerukkaatissaateqassaaq minnerpaamillu 830 FE-nik nersussuarnut annernut ataasiakkaanut tamanut nerukkaatissaateqassalluni, taakkunannga minnerpaamik 262,5 FE-t nersussuarnut minnernut ataasiakkaanut tamanut kiisalu 415 FE-t nersussuarnut annernut ataasiakkaanut tamanut ivikkanit nerukkaatissaassallutik,
- 2) nersussuit ataasiakkaat tamarmik ullormut minnerpaamik 4,15 FE-nik nerukkarneqassapput.

3) immikkut ittumik nerukkaatissat ivikkat amigaatigineqarnerini Nunalerineq pillugu Siunnersorteqarfimmuit qinnuteqaatigineqarsinnaavoq nerukkaatissanik ivikkanik atuinissamut piumasaqaatip nersussuarnut minnernut ataasiakkaanut tamanut nerukkaatissat ivikkat 131,25 FE-mut annikillineqarsinnaanera aamma nersussuarnut minnernut ataasiakkaanut tamanut nerukkaatissat ivikkat 207,5 FE-t.

**§ 6.** Savat, hiistit aamma nersussuit tamatigut imersinnaatinneqassapput.

*Nersutit inaasa aaqqissuunneqarnissaannut piumasaqaatit*

**§ 7.** Nunalerinermik ingerlatalik kinaluunniit savaateqartoq nersutit inaateqassaaq, tassani savanut ataasiakkaanut tamanut minnerpaamik  $0,75\text{ m}^2$ -inik inissaqassaaq kiisalu savanut ataasiakkaanut tamanut 40 cm-inik nerukkaanissamut inissaqartitsissalluni.

**§ 8.** Nunalerinermik ingerlatalik kinaluunniit hiistiuteqartoq nersutit inaateqassaaq, tassani hiistinut ataasiakkaanut tamanut minnerpaamik  $2\text{ m}^2$ -inik inissaqassaaq kiisalu hiistinut ataasiakkaanut tamanut 120 cm-inik nerukkaanissamut inissaqartitsissalluni.

**§ 9.** Nunalerinermik ingerlatalik kinaluunniit nersussuaateqartoq nersutit inaateqassaaq, tassani nersussuarnut minnernut ataasiakkaanut tamanut minnerpaamik  $1,8\text{ m}^2$ -inik inissaqassaaq kiisalu 65 cm-inik nerukkaanissamut inissaqartitsissalluni nersussuarnullu annernut ataasiakkaanut tamanut minnerpaamik  $2,4\text{ m}^2$ -inik inissaqassaaq kiisalu 80 cm-inik nerukkaanissamut inissaqartitsissalluni.

*Nersutaatit nalunaarutigineqartarnerat kiisalu nakkutilliineq*

**§ 10.** Nunalerinermi Nakkutilliisoqatigit nalunaarut manna malillugu aalajangersakkat aalajangersarneqarsimasut malinneqarnerat nakkutigissavaat.

*Imm. 2. §§ 3-miit 9-imut malinneqarnissaat qulakkeerniarlugu Naalakkersuisut inassuteqartoqarnissaanik inerteqquteqartoqarnissaanillu piginnittup akiligassaanik sulissuteqarsinnaapput, taamatuttaaq nerukkaatissanik ilassutissamik pisiniartoqarnissaanik kiisalu nersutit inaanni naammattumik inissaqartitsisoqarnissaanik imaluunniit nersutit ikilisinneqarnissaannik nalunaarummi matumani piumasaqaatit taamaalillutik naammassineqarsinnaassammata.*

*Immikkut akuersissuteqarsinnaaneq*

**§ 11.** Naalakkersuisut nalunaarummi aalajangersakkat saneqqunneqarnissaannut akuersissuteqarsinnaapput, ilisimatusarnermut tunngatillugu misissuinerit pissutsilluunniit immikkut ittut tamanna pisariaqalersippassuk.

*Pineqaatissiisarnerit*

**§ 12.** §§ 3-miit 9-mut aalajangersakkanik unioqqutitsinermi Kalaallit Nunaanni pinerluttulerinermut inatsimmi malittarisassat malillugit akiliisitaasussangortitsilluni eqqartuussisoqarsinnaavoq.

*Imm. 2.* Inatsisilerinermi immikkoortut inuttut isigineqarsinnaasut assingusumik pinerluttulerinermut inatsimmi malittarisassat malillugit imm. 1-mut ilaapput.

*Atuutilersitsineq*

**§ 13.** Nalunaarut una 20. juni 2016-imi atuutilerpoq.

*Imm. 2.* Ilutigalugu Namminersornerullutik Oqartussat savaateqarneq hiistiuteqarnerlu pillugit nalunaarutaat nr. 25, 22. juni 2001-imeersoq atorunnaarsinneqarpoq.

*Namminersorlutik Oqartussat, ulloq 16. juni 2016.*

Nikolaj Jeremiassen

/

Jørgen Isak Olsen

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut